



ЎЗБЕК ХАЛҚ ЧОЛҒУЛАРИ ТУРЛАРИНИНГ РИВОЖЛАНИШ ТАРАҚҚИЁТИ ҲУСУСИДА.

Эргашев Муродбек Икромович

Андижон давлат педагогика институти

Тасвирий санъат ва мусиқа таълими

кафедра мудири

Аннотация

Маколада ўзбек мусиқа маданияти тарихи, чолғу ижрочилиги ва халқ чолғуларининг ривожланиш босқичлари шунингдек, мусиқий асарларнинг инсон маънавий ва маданий ҳаётидаги тарбиявий аҳамияти, Шарқ олимларининг мусиқий рисолаларида баён этилган чолғуларга тегишли маълумотларни ёритишга эътибор қаратилган.

Калим сўзлар: мусиқа маданияти, маънавият, тарбия, халқ чолғулари, мусиқий чолғулар, ўзбек мусиқаси, чолғу ижрочилиги.

О ходе развития видов узбекских народных инструментов

Аннотация

В статье основное внимание уделяется истории узбекской музыкальной культуры, этапам развития музыкальных инструментов и народных инструментов, а также воспитательному значению музыкальных произведений в духовно-культурной жизни человека, а также сведениям, связанным с музыкальными инструментами, изложенным в музыкальные трактаты восточных ученых.



Ключевые слова: музыкальная культура, духовность, воспитание, народные инструменты, музыкальные инструменты, узбекская музыка, музыкальное исполнительство.

Abstract

The article focuses on the history of Uzbek musical culture, the stages of development of musical instruments and folk instruments, as well as the educational importance of musical works in the spiritual and cultural life of a person, and the information related to musical instruments described in the musical treatises of Eastern scholars.

Key words: musical culture, spirituality, education, folk instruments, musical instruments, Uzbek music, musical performance.

Ўзбек халқининг мусиқа маданияти жуда узоқ тарихга эга. Ушбу мусиқий маданият тарихий тараққиёт давомида халқ мумтоз мусиқаси, анъанавий қасбий мусиқа, халқ бастакорлиги, шунингдек, фольклор - ҳаваскорлик мусиқий мероси сингари шаклан ва услубан бир-бирига яқин ижрочилик кўринишлари бир-бирини тўлдириб келган. Бу мусиқий меросимиз бугунги кунимизда ҳам маънавий маданиятимизнинг бир бўлаги сифатида намоён бўлиб келмоқда.

Мустақиллик шарофати билан миллий-маънавий қадриятларимизга, урф одатларимизга, унутилаёзган, тарихан қадрли анъаналаримизга бўлган эътибор, уларни янгидан ислоҳ этиш жараёни устивор йўналиш қасб этди. Мустақилликнинг дастлабки йиллариданоқ ота-боболаримиздан, аждодларимиздан қолган маънавий бойликларни, жумладан, мусиқий маданиятни авайлаб асраш, тиклаш борасида, қолаверса, замон билан ҳамоҳанг қадам ташлаш борасида талайгина ишлар қилинди. Бу борада аждодларимиз бизларга мерос қилиб қолдириб кетган улкан маънавий бойлигимиз асосий омил бўлиб хизмат қилмоқда.

Бизга тарихдан маълумки, маънавиятимизнинг асосий бўғини бўлган мусиқа маданиятимиз, анъанавий қўшиқларимиз, мақом ижролари ҳамиша халқимизнинг кундалик ҳаётида маънавий озуқа сифатида эътироф этиб келинган. Халқ оғир

кунларида мусиқадан нажот излаган, хурсандчилик кунларида ҳам қўшиқ ва мусиқа уларга ҳамроҳ бўлган.

Ўзбекистон Республикасининг Биринчи Президенти И.Каримов айтганларидек: “Инсон шахсини, унинг юксак маънавий фазилатларини камол топитириш, миллий истиқлол мафкурасини шакллантириш, ёш авлодни бой маданий меросимиз ҳамда тарихий қадриятларимизга хурмат-эътибор, мустақил ватанимизга меҳр-муҳаббат руҳида тарбиялаш талаблари олдимизга муҳим вазифаларни қўймоқда”.¹²

Зеро, бугунги муборак мустақилликка эришган кунимизда, ўзлигимизни англаб бораётган бир даврда улкан маънавиятимизнинг бир бўлаги бўлган, отабоболаримиздан мерос бўлиб келган миллий мусиқий маданиятимизга суюниш, миллий чолғуларга мурожаат қилишимиз табиий бир ҳолдир. Буларнинг барчаси баркамол авлод тарбиясида, ёшларнинг маънавий дунёқарашини шакллантиришда муҳим аҳамият касб этади.

Анъанавий мусиқа ва чолғулардан янграган миллий мумтоз куйларимиз одамларни ҳамиша иймонга, меҳр-оқибатга, одамийликка чорлаб келган. Бугунги кунда ҳам шу долзарблигини йўқотмаган ҳолда, кишилар онгини шакллантириш йўлида ҳамда баркамол авлод тарбиясида муҳим омиллардан бири бўлиб келмоқда.

Маълумки, мусиқий чолғулар халқларнинг моддий ҳамда маънавий бойлигидир. Чунончи, ҳар бир халқ ўз миллий мероси, даврлар оша юзага келган анъаналарини миллий оҳанглар орқали тараннум этувчи ва халқнинг миллий маънавиятига хос яратилган амалий санъат намуналари орқали уларга мос келувчи чолғуларига эгадирлар. Ўзбек мусиқий чолғулар олами бу хусусда маънан ва моддий нуқтаи назардан бой ҳамда ранг-баранг эканлигини эътироф этиб ўтиш лозимдир. Қолаверса, қайсики халқнинг маънавияти юксак бўлса, унинг тарихи ва унга мос мероси ҳам улкандир.

¹² Каримов И. Янгича фикрлаш ва ишлаш - давр талаби. -Тошкент: Ўзбекистон, 1997, 222-6.



Ўзбек халқ чолғулари ранг-баранг тарзда мусиқанинг барча тармоқларига мос ҳолда шаклланиб, асрлар оша ривожланиб келган. Ўтмиш алломалари Ал-Форобий (IX аср) ўзининг “Катта мусиқа китоби”да, Сафиуддин Урмавий (XII аср) мусиқий рисоласида, Абдулқодир Мароғий (XIV аср) “Жами ал-алҳон фи-илм ал-музиқий” рисоласида, Аҳмадий (XIV аср) “Созлар мунозараси” асарида, Зайнуллобиддин Ҳусайний (XV аср) “Рисола дар баёни қонуни ва амалий мусиқий” рисоласида, Абдураҳмон Жомий (XV аср) “Мусиқий рисола”сида, Амулий (XVI аср) “Мусиқа рисола”сида, Дарвеш Али Чангий (XVII аср) “Мусиқий рисола”ларида мусиқий чолғуларни ўрганиб тадқиқ этиш масалаларининг турли томонларига тўхталиб, ўз даврларининг мусиқий чолғулари таснифотини баён этганлар. Ўтмишнинг забардаст шоирлари ўз асарларида мусиқий чолғулар номларини зикр этишда такрор ва такрор мурожаат этганлар. Айниқса, буюк мутафаккир шоир Алишер Навоий ўз асарларида мусиқа илмини энг нафосатли илмлардан бири эканлигини тъкидлаб ўтган.

Тарихий қўллётмалар, адабий асарлар ва мусиқий рисолаларда Ўрта Осиё халқлари амалиётида вужудга келган барча чолғуларининг номлари ўз ифодасини топган. Мусиқий рисолаларда эса чолғуларга тегишли (шакл, тузилиш, торлар нисбатлари, тайёрлаш мезонлари, чолғулар учун ишлатиладиган дараҳтлар ва х.к. ҳақида) маълумотлар келтирилган.

Торли чолғулардан: уд, руд, қўбуз, ғижжак, навҳа, нузха, қонун, чанг, рубоб, танбур, дутор;

Дамли созлардан: руҳафзо, шаммола, органун, сибизғи, найи анбон, чағона, буламон, сурнай, най, қўшнай, карнай;

Урма чолғулардан: даф, доира, ноғора, сафоил кабилар ҳақида турли даражадаги маълумотлар келтирилган.



Бу мусиқий чолғуларнинг халқимиз орасида қадим-қадимдан мерос бўлиб келаётганлигидан далолат беради. Улар кўп асрлик тарихга эга, ҳар бири миллий омиллар билан суғорилган.

Мусиқий чолғулар маданий меросни ўрганиш масаласида, замонавий халқ хаётидаги аҳамияти ҳамда амалиётда қўлланилиши кесимида ўрганилиши мумкин. Мазкур соҳа батафсил тадқиқот мавзуси сифатида халқ орасида мавжуд чолғуларнинг технологик хусусиятлари ва такомиллашув имкониятларини янги шарт-шароит билан боғлиқлиқда очиб беришни мақсад қилдик.

Мусиқий чолғулар моддий маданият маҳсулоти ҳисобланиб, маънавий маданиятга ҳам алоқадордир. Чолғуларнинг тузилиши, уларнинг имкониятлари мусиқий тафаккур қонуниятларини ҳамда маълум даражада жамият ривожининг муайян босқичда қарор топган эстетик дидини ҳам акс эттиради.

Шуни назарда тутиш керакки, узоқ ўтмишга нисбатан мусиқий чолғулар ёки уларнинг маданий ёдгорликларда сақланиб қолган тасвирлари жамиятнинг мусиқий хаёти ҳақида маълумотларнинг ягона манбаи ҳисобланади. Шу жиҳатдан, мусиқий чолғулар ҳақида узоқ ўтмишдан бизгача етиб келган турли афсона ва ривоятлар ҳам тарихимизнинг мусиқий олами манзарасини чизиб беради.

Мусиқий чолғуларнинг келиб чиқишини ўрганишда Ўрта ва яқин Шарқ мусиқий олами мифологиясига тегишли тотемизм қатламига эътибор қаратиш жоиз. Тотемизм ибтидоий-жамоа тузумининг қадимги даврларида, матриархат ҳукмонлигига юзага келган бўлиб, унинг илк тасаввурлари фаришталар, деву жинлар, хайвонлар ва ўсимликлар билан боғлиқ бўлган. Ушбу қатламга оид афсоналарда ривоят қилинишича, кунлардан бир куни бир олим саёҳатга чиқиб, дам олиш учун бир дарахтнинг тагига ўтирибди. У шоҳдан-шоҳга сакраб юрган маймунни кўрибди. Бирдан маймун ўткир шоҳга илиниб, қорни ёрилиб кетибди ва ичаклари иккита шоҳ орасига тортилиб қолибди. Бир оз вақт ўтгач, бу ичаклар қурибди, шамол эсиб, ундан юракни мафтун этувчи товуш таралибди. Олим бу ичакларни олиб, қийшиқ тахтага тортиб қўйган экан, ундан яна ҳам гўзал товушлар таралибди. Сўнгра у бир неча тор



ясад, тахта остига қовоқ ўрнатибди ва натижада мусиқий чолғу дунёга келибди. Бундан кейин ҳар бир олим ўзининг онги ва тафаккурини ишга солиб, бу чолғуни қонун ва ребаб чолғулари ясалгунга қадар турлича такомиллаштирган¹³.

Яна шунга ўхшаш ривоятлардан бирида ҳикоя қилинишича, танбур, дутор, най, ғижжак чолғулари тўртта фаришта, яъни, элчи фаришта Жаброил, оламни ҳаракатлантирувчи фаришта Микоил, охиратда карнай чалувчи бўрон фариштаси Исрофил, жон оловучи фаришта Азоилларнинг жонни Одам Ато танасига киритишдаги саъй-ҳаракатлари ва Шайтоннинг аралашуви туфайли вужудга келгандир. Созанда ва меҳтарлик рисолаларида қайд этилишича, улар жаннатдан “дуп”, яъни, тут ёғочини олиб чиқиб чолғуларни ясаган эканлар¹⁴.

Демак мусиқий чолғуларнинг келиб чиқиши қадим-қадим даврларга бориб тақалар экан, инсоният тараққиётининг барча босқичларидан ўтиб, такомиллашиб борди ва ўрта асрларга келиб илк бора ал-Форобий, ибн Сино, Абдураҳмон Жомий, Дарвеш Али Чангий сингари мутафаккирларнинг рисолаларида илмий жихатдан ўз ифодасини топган. Ўрта аср олимларининг асарларида мусиқий чолғуларнинг яратилиши, созларнинг технологик тузилиши ва қўлланилиши хақидаги маълумотлар ниҳоятда қимматли ҳисобланиб, чолғуларнинг келиб чиқишидан бошлаб, то бугунги кунга қадар бошдан кечирган тараққиётини кузатиш имконини беради.

Умуман олганда, ўрта асрларга оид тарихий материаллар мусиқий чолғуларнинг мавжудлик манзарасини тўлақонли акс эттиради. Бунда илм аҳли (ал-Форобий, ибн Сино, Абдураҳмон Жомий, Дарвеш Али Чангий) мусиқий чолғуларни назарий томонлама таърифлаган бўлса, адабиёт ва санъат аҳли (Навоий, Фирдавсий, Бобур) эса уларнинг амалий тадбиқи, ҳаётдаги ўрнидан ҳикоя қиласди.

¹³ Зия ад-Дин Нахшабий. Книга попугая (Тути-наме)./Пер.с персидского Е.Э.Бертельса. -М.,1982.

¹⁴ Бу ҳақда батафсил қаралсинг: Матёқубов Б. Хоразм достонларининг мусиқий хусусиятлари.//Мусиқа ижодиёти масалалари. -Т.,1997. 31-326.



Ал-Форобий, Абдураҳмон Жомий, Амулий, Дарвеш Али Чангий, Абдурауф Фитрат, Виктор Беляйевлар ўз рисолаларида мусиқий чолғуларга жиддий эътибор билан ёндошиб, уларни амалиётдаги тутган ўрни, айрим ўзига хос хусусиятларини ёритганлар.

Одатда, мусиқий чолғулар ижрочилик амалиётининг турли йўналишларида қўлланилиб келинган. Аввало энг содда чолғулар яратилиб, кундалик ҳаёт тарзида кенг фойдаланилганлигини қайд этиш жоиздир. Бундай чолғулар ҳар бир халқнинг чолғулар дунёсида мавжуд. Айни пайтда ҳам истеъмолда бўлиб келмоқда. Ўзбек халқ ижрочилик амалиётида сақланиб, қўлланиб қелинаётган чолғулардан чанг, қўбиз, сибизги шулар жумласидандир. Бу чолғуларни тайёрлаш ва ижро этиш ҳам оддийлиги билан ажralиб туради.

Даврлар ўтиши, жамият тараққиёти мезонига чолғу созлар ҳам ҳамнафас тарзда ривожланиб, замонага мос такомиллашиб, мукаммаллашиб борган. Тарихий манбаларда, Кулмуҳаммад Удийнинг уд чолғусига тўртинчи сим таққанлиги ёки ғижжак чолғусининг аввал икки торли, кейин учинчи ва тўртинчи торлари тақиғанлиги каби маълумотлар айнан чолғулар такомиллашиши билан боғлиқдир. Такомиллашиш жараёнида чолғуларнинг шакл ва тараннум (овоз) мезонларини бойитиш катта аҳамият касб этган. Бу икки мезон чолғуларнинг маънан ва моддий қийматини ҳам белгилашга асос бўлиб хизмат қилган. Зеро, чиройли чолғу гўзал овозга эга экан, у халқ маънавий бойлиги ҳамда мулки эканлигини эътироф этиш лозимдир.

Чолғушунослик илми фанда “органология” деб юритилади ва чолғуларнинг шаклланиши, амалиётда қўлланилиши ҳамда ривожланиш мезонларини илмий асослаб беради. Ушбу фаннинг ривожида бир қатор Шарқ ва Farb олимлари қаторида ўзбек мусиқашунос олимлари ҳам муносиб тадқиқотлар олиб борганлар. Қадимий чолғулар кўпроқ тарихий обидалар орқали кашф этилиб, кейинчалик тарих, адабиёт ва мусиқий рисолаларда баён этилган.



Чолғуларнинг илк тасвиirlари қадимги одамларнинг истиқомат жойлари — горларда, қоя тошларда ўйиб чизилган, иморатларнинг пештоқлари, саройларнинг деворий суратлари, сопол идишларга чизилган суратларда ва терракота ҳайкалчаларида аксини топган. Ўрта Осиё ва Ўзбекистон ҳудудларида Афросиёб, Далварзинтепа (Сурхондарё), Варахша (Бухоро), Айритом, Зартепа, Кўй қирилган ва Кўзи қирилган тепалар (Кўхна Урганч), Панжикент каби қадимий жойлар қазилмаларидан топилган чизма сурат ва ҳайкалчалар шулар жумласидандир. Қадимий суратларда арфа, уд, найсимон ҳамда урма чолғулар акс эттирилган. Мусиқий чолғу ижрочилигига бўлган эҳтиёжни айнан ушбу суратлардан кўриш ҳам мумкин. Суратларда нафақат якка ижрочилар ёки чолғунинг ўзи акс эттирилган, балки, Айритом қазилмаларидан топилган тарихий обидаларда қадимги Сўғд маданиятига хос ансамбль яъни, бир қатор мусиқачиларнинг чолғуларни гурух бўлиб ижро этаётганларининг акси туширилган.

Мусиқий чолғуларнинг таърифи яъни, уларнинг шакли ва тузилишлари, таркибий жиҳатлари, номлари, ижрочилари билан боғлиқ маълумотлар, асосан ўрта асрлардан бошлаб бадиёт асарлари ҳамда мусиқий рисолаларда ёритила бошланди. Демак, ўрта асрларга келиб қадимдан шаклланиб ва такомиллашиб келган халқ мусиқий чолғулари ижрочилик амалиётида ўз ўрнини топган. Шу билан бирга нафақат халқ, балки олимларнинг эътиборини ҳам қозонган. Бу жараённи О.Матёқубов “Мақомот” китобида қўйидагича баён этади: “Чолгуларга бундай атрофлича қизиқишлар замирида мусиқий асбоблар ижрочилик фаолиятини объектив акс эттиришdir, деган илмий тушунча ётади. Форобий таъбири билан айтганда, чолғу асбобларининг шаклланиши, аввало, амалиётда юзага келади. Уларнинг тембр-акустик хусусиятлари парда ва товушқаторлари бевосита ижро жараёнида шаклланади ва такомиллашади. Шундан сўнггина чолғулар олимлар қузатуви ва умумлашмаларига замин бўлиши мумкин”¹⁵.

¹⁵ О.Матёқубов “Мақомот” Т.: 2004



Бунга кўра Абу Наср Форобий, Абу Али Ибн Сино, Абдуллоҳ ал-Хоразмий, Зайнуллобиддин Ҳусайнин, Сафиуддин Урмавий, Абдулқодир Мароғийлар ўз рисолаларида чолғулар ва уларнинг бир қатор сифат ва хусусиятлари хусусида муфассал сўз юритганлар.

Жумладан, Алишер Навоий ўз замонасининг чолғуларини шундай тавсифлайди:

най – “дард ўтига эл беради”;

ғижжак – “чўзиқ нолалар чекиб, ёлборади”;

танбур – “мафтункорлик билан ҳалок этади, унинг ҳаловат пардасини чок этади”;

чанг – “зорланиб, бўғзини чўзади”;

уд - “ёлбориши чангнидан ҳам ортади”;

рубоб – “бошини эрга қўйиб илтимос қилганда”,

қонун - “ноласи қулокқа эшитилади”¹⁶

Ҳазрат Навоий мусиқий созларга шундай таъриф берар экан, ҳар бир чолғуда инсон қиёфасини кўради, ҳар бир чолғунинг хусусиятини инсон руҳияти ва тафаккури билан боғлайди, ҳар бир чолғунинг аҳамиятини одамзод дунёси билан чамбарчас этади. Умуман олганда, ўрта аср мутафаккирларига хос бўлган эстетик дунёқарашга мансуб фалсафийлик, мушоҳадавийлик, фикрга ўта нозик бўёқ бериш хусусияти санъат соҳасида, хусусан, мусиқий чолғулар соҳасида яққол акс этади.

Мусиқа санъатининг бой маънавий жиҳатлари бадиий адабиёт намояндаларини ҳам бефарқ қолдирмаган. Мусиқа сехри, чолғулардан тараалган сирли оҳанглар Шарқ бадиий проза ва мумтоз шеърияти, бадиий адабиётида ўзига хос ифодасини топади. Булар беназир чолғу созлар номланиши, ўз даврининг машхур ижодиёт намуналари,

¹⁶ А.Навоий. Махбуб ул-қулуб. -Т., Ғ.Ғулом номидаги адабиёт ва сан'ат нашриёти-1983



бастакор, созанда ва хонандалар ижоди, халқ мусиқа ижодиёти ва анъаналарида кўринади.

Ўрта асрларда мусиқий жараёнга кўпроқ аҳамият берган адабиёт намояндалари Фирдавсий, Рудакий, Ҳофиз, Саъдий, Жомий ва Навоийлардир.

Жумладан: Фирдавсий “Шоҳнома”да ёзади:

Йиғилди акобир, чолғучи, раққос,

Подшо шодлигидан сочар дур, олмос.

Чиқар авжига най, чилдирма саси,

Чириллаб айланар қизлар галаси.

Улуғлар шаънига қадаҳ пайдар-пай,

Саҳаргача тинмас танбур, рубоб, най.

Бундан маълумки най, чилдирма (доира), танбур, рубоб кўхна маданиятилизнинг бир бўлаги бўлиб келган.

Шунга ўхшаш ўрта асрларда яратилган тасвирий миниатюраларда шоҳ хузурида, шоҳона базмларда кўплаб мусиқий чолғулар ижро қилиб турган созандалар ўз аксини топган. Бунда қўлида соз тутган чолғучилар ансамбллари кенг ўрин эгаллайди. XV-XVII аср миниатюралари ва ёзма манбаларини ўргана туриб, майший ҳаёт, турли йиғинлар ва сарой қабулларида хилма-хил мусиқий чолғуларнинг акс этганини кузатиш мумкин. Бу даврга келиб, Ўрта Осиё ва Хурросонда чолғу ижрочилиги маданияти юксак даражага эришган. Аксарият ҳолларда мусиқачилар оддий ҳунармандлар орасидан чиқкан бўлиб, мусиқачилик касби уларга юқори табақага кириш учун йўл очиб берган. Натижада, уд, най, ғижжак, танбур ва қонун ижрочилигида юқори даражага эришган ҳунарманд ёшлар зиёли инсонларнинг шеърий ва мусиқий мажлисларида қатнашиш хуқуқини қўлга киритганлар. Мусиқани тушуниш, унинг хусусида фикр юрита олиш ҳар қандай маърифатли ҳиротлик ёки самарқандлик инсон учун мажбурий ҳисобланган. Бу давр шеъриятини вараклаганда



турли хил мусиқий чолғуларнинг номларини учратиш мумкин. Бунда чолғуларнинг юракда эҳтиросли муҳаббат имкониятини беришга эга эканлиги айтиладики, бу хусусият ўрта асрларда ниҳоятда қадрланган.

Ўрта асрларда мусиқий чолғуларга нисбатан бўлган бундай эҳтиром кейинги асрларда ҳам анъанага айланиб, давом этаверди. Табиийки, кейинги ўтган вақт ичida давр тафаккурининг ўзгариши, мамлакатлараро алоқаларнинг таъсири, илм-фан, маданият ва санъат соҳаларининг ривожи натижаси ўлароқ, мусиқий созлар ҳам санъат усталари қўлида такомиллашиб, мукаммаллик даражасига етиб бораверди.

